

Dumonda Loi concernent las surdadas da las lavurs vi dal tunnel d'Arosa da la Viafier retica

Per sanar il tunnel d'Arosa da la Viafier retica è vegnida publitgada ina incumbensa tenor las directivas GATT/WTO. Pliras offertas èn entradas. Quellas èn vegnidas controlladas areguard la cumplettadad e validadas tenor criteris d'agiudicaziun. La finala han ins pudì tscherner tranter duas offertas ch'eran praticamain equivalentas areguard il pretsch ed areguard il criteris d'agiudicaziun.

1. rang: Heitkamp Construction Swiss ScRL, 6036 Dierikon	fr.	22 423 133.75	(100%)	26,58 puncts
2. rang: Cuminanza da lavur IARO, c/o Lazzarini SA, 7000 Cuira	fr.	22 543 609.10	(100,5%)	26,56 puncts
Differenza	fr.	120 475.35		

En la publicaziun e tar la surdada èn ils facturs da validaziun vegnids fixads sco suonda:

Pretsch	60%
Rapport tecnic	25%
Andament da construcziun/program da construcziun	10%
Persunas decisivas	5%

La firma Heitkamp è ina societad da domicil ed appartegna cumplettamain ad in concern da construcziun russ (Renaissance Group) ch'è en possess d'in miliardari tirc. La firma è activa en Svizra dapi in tschert temp en la construcziun da tunnels ed ha avunda capacitads e know-how.

A la Cuminanza da lavur IARO èn participadas las firmas Brunold SA, Arosa, Mettler Prader SA, Cuira, Lazzarini SA, Cuira cun 70% e la firma Pizzaroti, Bellinzona (commembra da la Societad grischuna dals impressaris constructurs) cun 30%. Er ellas han las abilitads ed experienschas necessarias per realisar ina incumbensa da tala complexitad e grondezza.

La Viafier retica è dependenta fermamain dal chantun Grischun ed è colliada stretgamain cun tal. Per il manaschi e per il mantegniment vegnan impundids er meds finanzials publics. Perquai èsi ordvart dubitaivel e nunchapibel, pertge che lavurs da tala dimensiun vegnan surdadas ad ina interpresa estra en in lieu periferic. Quai cunzunt, perquai che la differenza dals pretschs importa mo in mez pertschient.

Sche interpresas da construcziun indigenas survegnan – per uschè dir davant la porta-chasa – ina incumbensa en l'atezza da 22 milliuns francs, che vegn per part finanziada cun daners publics, e sch'ellas pudessan uschia occupar 30 collavuraturas e collavuraturats durant 3 onns, fissi urgentamain giavischè che las persunas responsablas per la surdada da las lavurs mussassan dapli curaschi e considerassan questa decisiun en moda cumplessiva.

Gist en in temp, nua ch'i vegnan dadas ora en l'entir pajais milliardas per sustegnair l'economia, èn talas decisiuns – er sch'ellas èn probablamain correctas ord vista giuridica – difficilas d'acceptar e nunchapiblas cunzunt er per las lavurantas ed ils lavurants.

Il maun public surdat uschia cuntinuadamain incumbensas grondas a concerns internaziunals e prenda davent pussaivladads da gudogn e da svilup da las regiuns perifericas. Pervia da lur grondezza n'han interpresas da construcziun indigenas da l'entir chantun betg las pussaivladads da s'annunziar sco ils concerns gronds internaziunals per incumbensas sin l'entir mund. Perquai duain interpresas chantunalas vegnir resguardadas meglier cunzunt en cas d'incumbensas grondas dal maun public. Ina midada da l'Ordinaziun da submissiun s'impona areguard ils facturs da validaziun. Degna da vegnir examinada fiss er la dumonda, sche incumbensas grondas – che han ina differenza dals pretschs da main che 2% suenter la rectificaziun da las offertas – na stuessan betg vegnir surdadas obligatoricamain ad interpresas dal Grischun a partir d'ina tscherta summa. Criteris sco la francaziun regionala e l'impurtanza micro-economica ston vegnir validads pli fitg.

En general vegn il pretsch validà memia fitg tar surdadas dal maun public. Il domicil, l'ecologia/l'enconuschientscha da las relaziuns localas (green deal) ed auters aspects vegnan validads memia pauc. Il factur da validaziun «pretsch» vegn validà relativamain ferm cun 50–60%.

Las sutsegnadras ed ils sutsegnaders dumondan la Regenza:

1. Vegn la Regenza mintgamai infurmada davart surdadas da lavurs da la Viafier retica en questa dimensiun?
2. Va la Regenza da princip d'accord cun questas interpretaziuns?
3. Vesa la Regenza in basegn d'agir?
4. È la Regenza pronta d'examinar l'Ordinaziun da submissiun en il rom da las pussaivladads legalas e d'eventualmain adattar tala sco pretendì?

Cuira, ils 19 da zercladur 2020

Loi, Jenny, Grass, Hohl, Aebli, Berweger, Brandenburger, Buchli-Mannhart, Caluori, Cantieni, Clalüna, Danuser, Ellemunter, Felix, Flütsch, Gasser, Gugelmann, Hardegger, Hartmann-Conrad, Hefti, Hug, Kasper, Koch, Lamprecht, Michael (Donat),

Müller (Susch), Natter, Niggli (Samedan), Niggli-Mathis (Grüsch), Papa, Tanner, Ulber, von Ballmoos, Waidacher, Widmer-Spreiter (Cuira), Zanetti (Sent)